



山川典第一百七十一卷

雲山部彙考

道書第六十九福地之雲山

雲山在今湖廣寶慶府武岡州城南一十五里山有七十一峯宋郡守汪立中建七十一峰閣於上
中有日華月華二山以及杏花塢投龍洞猿藤水道者巖侯公洞諸勝

雲山圖





考

按洞天福地記第六十九福地雲山在邵州武岡縣

按方輿勝覽湖南路武岡軍雲山在武岡縣此山爲一郡勝處

按三才圖會雲山在寶慶府武岡州城東南一十五里山上有七十一峯宋郡守汪立中嘗建七十一峯閣於上道書以此山爲第六十九福地中有日華山月華山杏花塢投龍洞猿藤水道者巖侯公洞

按廣輿記寶慶府雲山在武岡州昔盧侯二生避秦於此

按武岡州志山川攷雲山在城南十五里自麓至頂盤磴而上又十餘里有七十一峰相傳爲七十二峯一峰飛去靖州城外遂成勝景餘峯名多失考惟紫霄日華月華芙蓉香爐最著道書列爲六十九福地昔盧侯二生避秦來此與本地譚真人合爲修煉後同昇舉中有煉丹池掃壇竹兩竹立壇側每風至則一出一入對掃杏花塢投龍洞猿藤水盧仙巖侯公洞侯仙跡盧仙影道者巖瀑布泉起雲洞仙人橋木龍頭飛昇臺演經臺將軍石諸蹟峯巒簇峙爲州雄鎮第一景舊有勝力寺盧

侯譚三真祠宋郡守汪立中建七十一峯閣於寺上明嘉靖壬寅知州王暄建萬壽宮於真人祠後
郡人潘應星標題十景曰兩華聳翠一瀑飛濤仙橋橫漢杏塢藏春竹臺風掃丹井雲封石畔遺蹤
洞門餘影巖前簾水雲外鐘聲

雲山部藝文

詩

雲山清曉

唐王昌齡

蒼深翠淺濕崢嶸豈謂譏秦始愛山一炬咸陽機冢赤紫霄巍立曉雲間

前題

宋陳與義

翠嶽奇峯萬疊橫山花開後暖風輕楚天曙色平分處一帶烟光畫不成

前題

明熊昱

層巒疊嶂宿雲橫芳樹飛花撲地輕荏苒晴光山外曉霞明嵐彩自天成

雲山部紀事

廣輿記盧侯二仙世傳秦始皇遣盧生入海求神仙藥不獲遂與侯生隱雲山今煉丹井飛仙臺掃

竹臺皆其遺跡也

紀事之一

二酉山部彙考

秦人藏書之二酉山

二酉者大酉小酉也大酉山在今湖廣辰州府城西北四十里小酉山在辰州府城西五十里二山相連昔有秦人藏書於此

山西圖





考

按盛弘之荊州記小西山石穴中有書千卷相傳秦人於此隱學因留故梁湘東王公訪酉陽之逸典是也

按洞天福地記第二十六洞大酉山周迴一百里名大酉華妙之天在辰州

按方輿勝覽湖北路辰州小西山又名烏速山在酉溪口方輿記云山下有石穴中有書千卷秦人避地隱學於此梁湘東王謂訪酉陽之逸典是也耆舊相傳堯時善卷唐張果老皆嘗隱居於此又名爲大酉華妙洞天

按三才圖會二酉山圖考大酉山在辰州府城西北四十里道書爲第二十六洞大酉華妙洞天上
有龍湫甚靈禱雨卽應山之巔有善卷墓 小酉山在府城西北五十里山下有石穴其中舊有書千卷相傳昔人避秦隱學於此梁湘東王賦云訪酉陽之逸典謂此

按潛確類書區宇部辰州府小酉山郡國志云在府城東又名烏速山又名大酉華妙洞天或云自酉溪西北行十餘里有洞與大酉山相連唐瞿柏廷爲兒時戲躍入并忽自華妙洞中出已去縣四

十餘里 大酉山在辰溪自銅仁萬山來至當縣酉地結爲大山山下有洞名大酉洞深廣二里

石筍倒垂泉若雷轟奇形怪狀莫可名悉人傳昔產丹硃自洞口流出輿地廣記云第二十六洞天穴生雲母崖滴丹砂卽此地也

按湖廣通志山川攷小酉山在辰州府城西北二十里周穆王藏異書處 大酉山在辰谿縣東

十里

二酉山部藝文一

大酉洞記

明王世隆

楚之西洞庭之北按武陵桃花源卽昔人避秦處也踰桃花源水行三驛程卽辰陽郡西北踰盧溪浦口四舍許爲大酉山卽道書所謂第二十六大酉華妙洞天古傳所謂穆天子藏書於大酉山小酉山之中者是也山多石洞豁豁深邃不類人世其濱江者特壁立倒出江側上有懸溜成石乳二一擊之作鐘鳴一作鼓鳴舊名之曰鐘鼓洞其在內者曰華妙洞洞門甚狹隘幽暗必揚燦仄行乃可入既入里許卽曠然平沙可游可臥再進則有石室相傳爲秦人藏書室卽穆天子藏書處也父

老相傳先世有樵夫入洞中卽石室取書出見風皆應手滅成灰塵今則無可見矣山之巔爲九峯嶺蓋宋道宗時嘗封禪天下名山福地茲山亦以名勝得與今猶有故封者九誌錄爲九峯嶺者誤也山腰有會仙橋及張果煉丹池雖不可信而居民耕作往往斷地多得靈砂滿缶數四蓋必昔之幽人志士所棲隱也莊子讓王篇謂舜有天下讓於善卷卷曰吾日出而作日入而息逍遙自得於天地之間吾何以天下爲哉遂不受逃之枉山宋封爲遁世高蹈先生今其遺跡具存而屈子所謂朝發枉渚兮夕宿辰陽枉山卽茲山也世隆嘗讀書茲山鄉之人士多從世隆遊者乃卽茲山爲書院曰大酉華妙洞書院爲堂二曰讓王堂曰逍遙堂蓋皆本莊子語及善卷之事而名之也曰高蹈祠卽宋故封之名以祠卷曰丹砂房蓋辰之土物莫靈於丹砂故神農嘗百草以丹砂繫之辰其名著矣故卽地所出而名之是皆余所作因是以求之庶幾乎不與草木同朽腐也其曰鐘鼓洞曰秦人藏書室曰會仙橋曰張果煉丹池曰九巔嶺則皆山所固有予不得而增損之焉夫莫大於天下莫聖於堯舜卷也乃於天下辭之而不受於堯舜薄之而不爲者其志遠矣要未可以隱逸一節之士論之也正猶丹砂不列於人間飲食嘗用諸品而其爲世外奇寶則世固有知之者嗚呼希矣是

豈易與俗人言哉

二酉山部藝文二

詩

遊大酉洞天

明陸燦

疇昔覽山經名蹟稱大酉乾坤遼闊吳楚長倚劍青冥只翹首誰云萬里今獨來決意茲遊信非偶
主人亦清真同余紫霞想旋披榛莽度巉巖細窺陰洞琅玕長側身初下覺黯黑却立斯須忽爽朗
千年古碧玉爲色垂乳晶瑩翠猶滴仙人去後石函空綠烟銷盡藏書室金燈閃倏知有無瑤草紛
蕤亂朱碧吁嗟此奇觀乍到神欲竦盤渦嵌竇深不測鳴流洩瀨驚奔瀕臨崖拄杖聽猶疑白晝或
恐風雷動我從放逐西南陬裏糧過入名山遊桃源偏仄嶽麓小眺遠未得開雙眸終然靈境諧夙
好造物似爲畸人謀根盤路轉更礪礪石田如掌琪花彈薈衣欲往心飈然水深泥滑愁無那何當
秉炬破幽暗淨掃雲林相對坐高秋晴日儻更來待余爲啟青銅鎖

二酉山部雜錄

能改齋漫錄荊州記曰小酉山上石穴有書千卷相傳秦人於此學因扁之故梁湘東王山賦曰訪

酉陽之逸典余乃悟段成式名書之所自也

月巖部彙考

周子擬畫太極圖之月巖

月巖一名穿巖在今湖廣永州府永明縣東三十里形如圓廩下有洞洞上有穴旁有東西二門入門仰望如見月然相傳周子畫太極圖卽擬此巖也巖下有濂溪書堂

月巖圖

